



---

责任审校 胡智勇

---

“培根铸魂·诗联天下”是湖南省文史研究馆2019年6月推出的系列诗词、楹联采风活动，旨在以优秀的作品，歌颂祖国大好河山，弘扬爱国主义精神，传承传统文化，打造湖南诗词、楹联品牌。本期收录2023年甘肃敦煌采风活动文史研究馆馆员、特约研究员、工作人员诗、词、联、赋作品共90首（副/篇）[其中1首为2010年获奖作品]。

## 熊东遨（12首）

### 癸卯上巳偕诸公访什川古梨园红色博物馆

#### 馆藏“文革”时期报纸已禁展

才伴春风度玉关，又随团队下皋兰。  
清空野缀梨花雪，起伏山堆赭石丸。  
临晚幸蒙天眼顾，傍流真羨水怀宽。  
十年我亦知情者，不用高人解谜团。

#### 黄河古渡

风刀雕尽古岩坡，往事留痕供琢磨。  
向海河流中国梦，钻天杨结老鸦窝。  
观之曷似闻之好，来者其如去者何。  
省识人间真快乐，夕阳烟外一渔蓑。

#### 敦煌道中得句

世间标配仗天缘，人类从来不占先。  
护守千秋尊典范，鸣沙山抱月牙泉。

#### 雅丹地质公园纪行

百种元形任取裁，洪荒影外阵门开。  
人生险径何需道，魔鬼城中走过来。

湘馆“诗联天下”甘肃行志感兼贺  
塞上风诗学院成立五周年（二首）

改尽横沙旧日装，春风使命自非常。  
前行会得天公意，吹醒诗苗绿朔方。

柳眉初画日初长，南北河山不二妆。  
寄语春风休却步，玉门今已去关防。

漠北行

飞轮穿大漠，真以国为家。  
溯古探遗址，登高踏软沙。  
绮霞千树艳，初日一竿斜。  
野近居延阔，唐音在水涯。

玉门道中寄怀（二首）

我本云中子，仙乡寄一隅。  
偶然经浊世，非约不同车。  
雁字天西北，星河梦疾徐。  
忍看秋沼上，孤月冷烟墟。

殷勤问衣食，日遣几封书。

霜见盈头白，情如执手初。  
独行临远塞，相忆越穹庐。  
心上吹能到，春风意有余。

### 沙湖写生

百种娇柔画不全，抚波如对小灵仙。  
明霞织锦晨妆着，宿鸟开声序曲圆。  
心逐舆图迷圣境，梦随驼队下银川。  
人间代有调和手，擅活枯根引雪泉。

### 大漠胡杨

风华凋尽剩顽根，犹向天涯极处伸。  
露积三更全品性，沙抟万里费精神。  
片云结阵情何已，孤月凌霄影自亲。  
冰窟火炉频选择，尚多余兴笑松筠。

### 自银川至额济纳旗客途走笔

一串驼铃入混茫，此行真欲破天荒。  
数声寒雁秋云白，千里横沙塞草黄。  
食野诚如诗所道，开边代有国之殇。  
光阴只是寻租者，赚取人间百样忙。

## 吕可夫（14首）

### 星城飞赴敦煌

大漠长沙万叠山，鹰忙客倦白云闲。  
今番我比春风幸，一梦逍遥度玉关。

### 机上所见

云中鸟瞰小祁连，雪浪腾丸欲接天。  
莫是春风存故意？不吹四月白绵绵。

### 敦煌遇沙尘暴

卷地尘沙日月昏，蓬头垢面户窗门。  
枝头一夜芳菲失，红杏伤春桃断魂。

### 莫高窟

石窟千年一旦名，敦煌顿令五洲惊。  
佛光普照三危岭，禅杖长探万里程。  
火暗室昏挥铁凿，青灯黄卷伴沙鸣。  
经书壁画像无数，尽是心和血写成。

### 鸣沙山

沙山静峙本无声，何故时闻雷鼓惊？  
许悯人间多枉屈，借风响作不平鸣。

### 月牙泉

四抱黄尘绿半湾，一牙水月独清闲。  
苍天几滴多情泪，碧洗鸣沙万仞山。

### 汉长城遗址

大漠狼烟掩汉旌，雄关烽燧阻胡缨。  
残垣数截依稀辨，不见当年塞上城。

### 玉门关

汉字旌旗曾蔽天，春风不度咏千年。  
谁怜断壁沙尘里，多少生灵浴血泉。

### 玉门关军仓

陵谷变迁河断流，当年秣庠剩荒丘。  
苍茫衰草残阳下，帝业君功一并休。

### 雅丹魔鬼城

剖面沙风卷地吹，寒侵厚袄帽纷飞。  
何年鬼斧神刀斫，碎裂山成破土堆。

### 河西走廊千里大戈壁滩

寸草不生何况花，虫难营穴鸟难家。  
风狂日烈沙尘暴，人定胜天敢妄夸。

### 明长城第一墩遗址

万里黄龙摆尾西，倚山接海御胡骑。  
一声羌笛惊乡梦，塞月霜锋照铁衣。

### 自嘉峪关坐火车过河西走廊

丝路驼铃逝不还，河西千里并非闲。  
凉州词曲翻新调，一夜春风度玉关。

### 访兰州什川世界第一梨园

万亩百年天下奇，春风三月雪离离。  
何须咏唱梨花泪，能历沧桑老未迟。

## 谢宏治（5首）

### 敦煌行

亘古敦煌话变迁，长河落日篆轻烟。  
云飞戈壁仙姬舞，雾捧驼铃沙月泉。  
一片丹心描圣域，千年佛窟绚尧天。  
党河新柳波光映，投影汉唐丝路前。

### 鸣沙山月牙泉

驼声穿大漠，碧水泛银波。  
新月一弯卧，春风度党河。

### 雅丹国家地质公园

探奇雅丹境，万载谜团悬。  
幽壑乌砂响，残云古洞穿。  
龙蟠吟瀚海，狮影卧平川。  
孤月银河冷，游人夜不眠。

### 祁连西行

一曲羌歌丝路游，白云大漠两悠悠。  
方盘城外明驼走，雪水溪边野兔遛。

魔幻雅丹谁怕鬼，雄关嘉峪我登楼。  
敦煌千佛凝霞彩，犹有黄河天上流。

### 中山桥

黄河桥上望黄河，一任长风卷巨波。  
劈地排山真气势，穿云破雾自巍峨。  
西迷白塔晴岚涌，东恋官塘汗马多。  
九曲肠回华夏土，奔流万里放新歌。

## 陈樵哥（18首）

湖南省文史研究馆组织“培根铸魂·诗联天下”  
采风活动，余随诸师友经西安转机敦煌有作

凭窗起落过长安，遥望沙丘绿抱团。  
光景肯随南国好，车庐拟逐北塞寒。  
无须笳鼓哀前事，有感关河裂外栏。  
抟翼御风俦侣盛，海棠山色忍同看。

### 敦煌（二首）

迷眼黄沙第一程，行人相望各嗟惊。  
看图拭剑因何事，论到沧桑语不平。

法像鸿经刻石幢，细搜岩窟久徜徉。  
千年抛掷风沙里，尚有残笺颂汉唐。

### 与智勇、罗冈、永红诸兄夜游党河

旋蹶游踪向晚川，汤汤一水尚依然。  
干戈犹起谁能记，勋业山颓自不眠。  
接岸楼台浮瑞气，覆城灯火听先鞭。  
良辰莫唱从军乐，举国升平祝寿夭。

### 旱 柳

根植阳关外，春来絮作花。  
黄沙枝舞瘦，白日影留斜。  
偶借天风力，催生地角芽。  
自存真气格，不用世人夸。

### 莫高窟怀张骞（二首）

煌煌佛窟逾千年，璧合中西化外天。  
丝路几多追梦客，同钦大汉有张骞。

胡汉相争战未休，和亲毕竟是权谋。  
打通丝路忘生死，万世传扬博望侯。

### 雅丹西海舰队

阵列朦朧过万千，风雕日刻不知年。  
黄沙作浪岩为舵，动静如何听老天。

### 鸣沙山

循循一队逐驼铃，负橐加冠塞上行。  
山势不平风不定，转沙日夜作雷鸣。

### 月牙泉

夜凉留客此徘徊，不语曾看万劫挨。  
绿水一湾回璧月，黄沙千里听轻雷。  
涵天负地闲何碍，种树谈棋老可偎。  
回首莫迷南北岸，驼铃响报故人来。

### 玉门关

烽烟古战场，血色染残墙。  
揭地沙尘暴，鞭空气浪狂。  
拓边开异域，插柳靖西疆。  
丝路天涯顾，雄关满客商。

### 过瓜州

安边定国记从头，到眼荒凉有宿愁。  
传语健儿多努力，朔风吹雨入瓜州。

### 万里长城第一墩

打马河西往复巡，此墩原抱战场伸。  
闲来莫望祁连冢，当日传烽有几人。

### 嘉峪关（二首）

汉家诸将出雄关，沸耳哀声盖雪山。  
闻说河西夸锁钥，忠心报国岂言还。

狼烟散尽剩空台，驼刺胡杨逐眼来。  
一叶海棠时在梦，祁连积雪有余哀。

### 祁连眺雪

一天寒色落沙堆，回望云烟拂斗魁。  
珍重升平好时节，马头捎带碧云回。

### 河西走廊

茫茫戈壁草难生，烈日狂沙阻客行。  
端赖汉家驼背使，一肩挑起两文明。

### 兰州黄河第一桥

崩涛裂谷气如虹，铸铁熔金普世功。  
慷慨为民须记颂，迢迢一水与天通。

## 皮元珍（9首）

### 题敦煌莫高窟藏经洞

数万藏经去不还，丹青永载泪斑斑。  
飞仙灵女关山远，长袖凄清洞壁间。

### 题月牙泉（二首）

闻说牙泉自古无，沙山鸣屈柳杨枯。  
一泓碧水如弯月，原是天仙洒泪珠。

蟾宫美酿入鸣沙，月下琼芳大漠华。  
水润绿洲神女助，驼铃一骑走天涯。

### 玉门关感怀

茫茫大漠立孤关，遥想当年战事艰。  
砾石黄沙埋白骨，弓弦利刃见垣斑。  
帝王自古图安在，戍卒由来去未还。  
但愿春风驼草绿，人间魔鬼葬阴山。

### 题玉门关

西域中原一步连，月升月落接霞烟。  
年年塞外氤氲色，疑是天仙玉手编。

### 雅丹地貌小记

洪荒大漠遍迷宫，横皱平纹绣壑空。  
巨笔丹青悬画卷，人间奇幻鬼神功。

### 吟嘉峪关

楼台跌宕近天西，遥望沧桑逐远蹄。  
鼙鼓晨昏催岁月，征人闻笛梦闺凄。

### 黄河第一桥（二首）

太白曾经踏浪来，仰头一啸暮云开。  
滔滔水去孤舟远，再奏鸣琴倒酒杯。

远望腾龙似古弦<sup>①</sup>，千山万壑尽旋延。  
游人慷慨惊回首，白塔高昂拥夕烟。  
千载丝绸驼队杳，一桥铁骨远关连。  
登高逸兴诗仙酒，举盏滔滔水上天。

注：①桥形如腾龙亦似竖琴。

## 周永红（10首）

### 莫高窟藏经洞

石室藏珍渺纪年，从知佛国幻桑田。  
缥緲差幸漂流远，或入秦坑岂得全。

### 鸣沙山月牙泉

大漠殊难寸草生，沙山亦作不平鸣。  
月牙倾泻泉如注，何事沾滋独一泓。

### 玉门关

剑戟消磨马辔闲，征夫空待玉门关。  
狼居胥外沙尘起，未见平氛驃骑还。

### 汉长城

疏勒河空久断流，残垣苜火黯瓜州。  
汉家早使长城坏，朔漠星沉化土丘。

### 雅丹国家地质公园魔鬼城

风刀削剥再而三，石走沙奔貌不堪。  
土地老儿变魔鬼，城隍无计缚顽贪。

### 敦煌城夜遇沙尘暴

时交戌亥始黄昏，却喜晴光灿晚暉。  
倏尔弥天尘雾起，恍如古纪入泥盆。

### 沙州城遗址

驼铃万骑绝尘埃，丝路于兹剩土堆。  
戎马凿通西域外，汉家檄布早成灰。

### 沙州夜市

夹道喧阗市肆开，商人捧出夜光杯。  
飞天欲借丹青手，先奉灵霄买路财。

### 长城第一墩

塞上孤寒矗一墩，从知帝力寡庥恩。  
土圪坨下多枯骨，重八祖龙堪等论。

### 登嘉峪关城楼

长城万里朔云间，春暮风凄嘉峪关。  
裙屐往来多瑟缩，戍楼犹见挈刀环。

## 罗冈（10首）

由湘入陇，过秦有怀诗人徐秋生

疫困元元历数年，寻幽入陇过秦川。  
高吟长啸思徐大，秋水云烟或万篇！

### 鸣沙山

雷惊鼓响听沙鸣，一跨双峰两脚轻。  
也学兰台班定远，驼铃声里向西行。

### 游月牙泉

神山鸣矣泉如月，遍野人驰声似雷。  
欲倒泓澄三百斛，要招弦管侑清罍。

### 过玉门关

看罢青山又雪山，须臾冷暖识天颜。  
舆图万里千秋壮，好借春风到玉关。

### 嘉峪关

男儿七尺佩刀环，雄峙西陲第一关。  
时听黑营吹马角，春闺梦里几人还。

### 游莫高窟

风来过宕泉，画阁得春妍。  
寂寂庄严佛，飞飞伎乐仙。  
遗书藏一洞，旧迹越千年。  
文化伤心地，残篇海外传。

### 过瓜州怀草圣张芝

纸上烟霞任卷舒，疾驰精劲独凭虚。  
临池尽墨创今草，人颂渊泉一笔书。

### 敦煌怀索靖

荆棘铜驼说五龙，英雄气概吐长虹。  
银钩蚕尾留书迹，文武兼资忆索公。

### 疏勒河忆学《曹全碑》

幼学临池写八分，首书一字即为君。  
今从旧地寻清绩，疏勒河边看白云。

### 汉长城遗址

墩燧颓残任自斜，恍闻羌笛恍闻笳。  
长弓刺破玉关日，健马冲开榆塞霞。  
叠鼓连旌飞碧血，雕戈画戟没黄沙。  
挥刀斩断天骄臂，从此威仪识汉家。

## 皮元珍（2首）

### 浪淘沙·陇西行

史馆友朋邀，春日扶摇，浮云竞渡玉门招。俯瞰天山冰雪色，陇地苍霄。

隐约六盘高，叠嶂迢迢，黄河九曲广沙飘。千古敦煌惊禹甸，天下奇标。

### 满庭芳·敦煌飞仙叹

西陇春寒，南山<sup>①</sup>飞雪，莫高千窟鸣沙。经藏高阁，书断渺烟霞。素女霓裳广带，轻摇曳，泪洒琵琶。徘徊久，清魂切

切，雁字梦长嗟。

凭栏添愁绪，回眸脉脉，落日归鸦。自古佳人怨，一别天涯，可叹阳关三叠，成典卷，彼岸佛家。为君意，年年旧恨，遥望暮云遮。

注：① 祁连山别名南山。

## 吕可夫（3副）

### 月牙泉（二副）

几片青云曛白日；  
一湾碧月润黄沙。

上善确无私，纵周围万顷黄沙，未遗落涟漪绿水；  
高天应有德，使潏滂一牙碧月，能润滋干渴苍生。

### 嘉峪关

扼祁连以锁马鬃，塞边咽，塞中塞，护六百年山河固若金汤，九泉为涌；

关西陇而维东夏，城外壕，城内城，拒八千里骐驎迅如铁矢，一隘莫开。

## 周永红（5副）

### 黑戈壁

处地极炎凉，独特黑面铁心，贫瘠不移金石志；  
与天齐寥廓，差胜绿茵白羽，悠游共契水云情。

### 党 河

河川本无意党朋，试鉴之操守襟怀，宜乎泾渭分明，洛濂  
养正；

山岳恒有关社稷，若奉以经猷法则，何必岱嵩祷圣，庐华  
求贤。

### 疏勒河

疏奏何劳水部，有舟船直捣河西，俯首旧波臣，藻葩不逊  
齐梁艳；

勒功岂必云台，想甲马横行漠北，回头新浪子，沾溉定教  
甘肃饶。

### 黄河母亲雕塑

河水苦慈亲，睹百孔沧桑，命运在悬，谁为孝子；  
世风娱看客，沐千年德泽，精神不立，乃作巨婴。

## 兰州黄河铁桥

乍兴于清季，旋踵看帝业覆亡，余百载津梁，夷技泰西师未远；

横跨在黄河，仔肩与民生奔走，怅两山壁垒，畏途天下患犹多。

## 石印文（1篇）

### 敦煌赋

以“春风度玉关”为韵

路溯丝绸，允为锁钥；策关军政，久作梁津。祖重三苗，此地仍称舜世；膏流九宇，环区尽作尧民。欲辉煌而盛大；借裨阖之经纶。中夏弘文，想见五凉之盛；党河流绿，惊回一郡之春。

而峰有三危，古号在都司之志；沙分五色，清泉若挂树之弓。经洞新开，睹遗书于绝域；佛龕长奉，继法乳于神宫。壁图彩塑之精，谁信成于晋代；大漠孤烟之景，已然落在杯中。绣壤耕春，实陵谷未迁之候；阳关听曲，沐戎行初发之风。

若夫墨池犹在，书坛得称圣之先；天马难寻，宸翰有驰輿之句。万年宗教，千佛同尊；一地人文，五龙独步。西凉西夏，非徒名号之迁；愿敦愿煌，实为弹丸之故。绿洲久浮于戈

壁，直是奇观；古邑新著于寰中，允为天顾。惠游赏于万民，任流连于几度。

然而旅游既旺，谁担持续之忧？风月尤多，孰节索贪之欲？源枯流断，仙湖罗布之前车；沙虐风狂，古国楼兰之往躅。虽云取用无穷；应悟盈虚有数。人皆望利，徒图一瞬之荣；天纵无私，难作千秋之续。以保护之心治郡，西疆自有明珠；以报还之心拓荒，沙漠自多碧玉。

于是植树导流，更肇地绿水清之状；扩城展郭，未辞风侵沙掠之艰。须知羌管胡笳，只属名区旧物；料得春风杨柳，焕然盛世新颜。物理不违，青山常在；人天共处，家国恒安。由是敦煌之名，不至流于字表；瑰宝之誉，依然赫列崇班。无意谀时，笔墨发先忧之慨；有心作赋，情怀寄朔漠之关。

注：此文获得2010年8月，由甘肃省敦煌市委、市政府和北京新国风诗社、中国传统文化促进会等单位联合举办的敦煌市全球征集《敦煌赋》一等奖第一名。

## 胡智勇（1篇）

### 敦煌赋

大漠东临兮浩瀚，雄关西峙以昂扬。贯气脉于天山兮，青云顾盼；并丝途于象域兮，圣迹留藏。观党水之涟波兮，景重林乎秀妙；延琼楼之耸立兮，市商旅乎繁忙。临沙岭以晴吟

兮，峰壑勾留玉露；观月泉之晓彻兮，虹霞荡漾波光。连绣壤之春耕兮，黄金镶乎翡翠；登古城以晚眺兮，盛誉谓之敦煌。

奕奕兮愚非好事，殷殷乎足备琼浆；借采风之聚首兮，品儒释于汉唐。于是探古寻奇兮，赏石窟之罗列；循规而守度兮，领佛相乎严庄。沐韶乐之清音兮，欲超凡而脱俗；仰飞天之妙态兮，纵思绪以翱翔。念先辈之功兮，万民云蒸汗气；忆昔年之貌兮，百景触动情肠。

徒拱立以凝神兮，情激昂而肃穆；悲时光于仰俯兮，唯咏句而吟章。聆大义于前贤兮，开胸中之气象；慕雄文之广布兮，响宇内乎铿锵。沙横戈壁于秦关兮，身披霞于晓梦；雁唳西风于槛外兮，心滴血于海棠。挟百战之威名兮，萦怀于社稷；涉双边之险境兮，覆体以冰霜。赫赫兮人民气节；威威乎华夏脊梁！承之天地兮，立于豪强。激情撰赋兮，集韵飞觞。